

PROGRAMA NASIONÁL DEZENVOLVIMENTU SUKU

12 Juñu 2014,

Knua Umaheuk, Aldeia Labubu, Suku Lacumesak Sub-Distritu Lacro, Manatuto-Timor Leste

Komunikadu Imprensa

Headlines: Ministru Administrasaun Estatál Inagura Projetu PNDS

Iha loron kinta feira semana ne'e (12/06/2014), Ministru Administrasaun Estatál, Dr. Jorge da Conceição Teme, sei inagura projetu Programa Nasionál Dezenvolvimentu Suku (PNDS) ba projetu konstrusaun be mós iha Knua Umaheuk, Aldeia Labubu, Suku Lacumesak, Sub-Distritu Lacro, distritu Manatuto.

Knua Umaheuk hanesan sub-aldeia ida husi aldeia Labubu ho nia distánsia mais ou menus kilómetru 27 husi kapitál Suku Lacumesak. Knua ida ne'e nunka sente Dezenvolvimentu nasaun ninia desde tempu Portugues to'o agora.

Sr. Malimau hanesan comunidade knua Umaheuk hatete katak : *"Iha tempo bailoro ami husi knua ida ne'e susar atu hetan bee mós ba ami nia moris loro-loron no ami tenke ba kuru bee mós iha bee matan tradisionál nomós bee mota ne'ebé mak iha"*. Atu asesu ba fatin ne'ebé iha bee, comunidade sira tenke la'o ho distánsia mais ou menus metru atus lima to'o kilómetru ida.

PNDS hanesan Programa Nasionál Dezenvolvimentu Suku fó oportunidade tomak ba comunidade Suku no Aldeia atu halo Dezenvolvimentu sá ida mak comunidade hakarak atu Dezenvolve tuir sira nia nesesidade. Iha knua Umaheuk aldeia Labubu comunidade tomak deside bee mós mak sai hanesan sira nia prioridade as liu, no proposta ida ne'e pasa iha nivel Suku hodi sai hanesan investmentu prioridade ba Suku no ikus mai hetan finansimentu husi programa PNDS.

Iha implementasaun projetu ida ne'e comunidade rasik mak jere tantu halo planu, implementa projetu, relatóriu kona ba gastus nomós oin sá atu mobiliza material konstrusaun husi estrada ba fatin projetu mais ou menus ho nia distánsia kilómetru rua liu.

Programa Nasionál Dezenvolvimentu Suku hanesan programa governu Timor Leste nian, lidera husi Ministériu Administrasaun Estatál ho Ministériu Finansas inklui mós ministériu sira seluk. Iha programa ida ne'e Governu Timor leste servisu hamutuk mós ho Governu Australia.

Orsamentu ba projetu konstrusaun bee mós ida ne'e nia montante **US\$15,065.11** (quinze mil, sessenta e Cinco vírgula onze), osan ida ne'e aloka hodi hola materials ne'ebé mak atu utiliza iha projetu konstrusaun bee mós hanesan pipa 2.5 km, tanke bee rua ho nia volume rihun rua atus lima litru, nomós konstrui torneira hanesan central bee matan ba comunidade hamutuk ualu. Total benefisiáriu husi projetu bee mós ida ne'e mais ou menus iha xefe de família nen nolu ho nia populasaun hamutuk atus hat resin.

Contact
e-mail
Phone number

: Duarte dos Santos, Chefe Komunikaun
: media@pnds.gov.tl
: +670 78188336